

13/09/2003

Pelbagai insentif untuk OKU

KUALA LUMPUR: Pelbagai insentif menarik disediakan untuk golongan kurang upaya dalam Bajet 2004 yang dibentangkan Datuk Seri Dr Mahathir Mohamad semalam, termasuk membenarkan semua kakitangan perkhidmatan awam yang mempunyai anak kurang upaya bekerja mengikut waktu anjal.

Kerajaan turut mencadangkan had kelayakan siling pendapatan ditingkatkan daripada RM500 ke RM750 bagi membolehkan lebih ramai orang kurang upaya yang bekerja menikmati bantuan elaun yang diberikan kerajaan sekarang.

Ketika ini, kerajaan memberikan RM200 sebulan sebagai Elaun Pekerja Kurang Upaya jika pendapatan bulanan tidak melebihi RM500.

Elaun itu antara lain bagi menggalakkan orang kurang upaya terus bekerja untuk menyara diri dan keluarga di samping membolehkan mereka menampung kos pengangkutan ke tempat kerja serta perbelanjaan lain.

Perdana Menteri berkata, ketika ini beberapa skim bantuan kewangan diberikan kepada golongan itu termasuk bantuan kewangan pada kadar antara RM80 hingga RM350 sebulan.

Sehingga pertengahan 2003, 122,543 orang kurang upaya telah mendaftar dan menerima bantuan berjumlah RM88.5 juta.

Selain itu, satu unit khas akan ditubuhkan di Kementerian Sumber Manusia bagi membantu golongan itu mendapatkan pekerjaan. Kerajaan telah memperuntukkan satu peratus daripada jawatan awam khusus untuk golongan itu.

Bagi membantu ibu bapa dan membela nasib kanak-kanak kurang upaya, kerajaan bercadang memberi elaun bulanan RM25 seorang kepada pelajar kurang upaya di sekolah rendah dan menengah bagi menggalakkan mereka mendapat ilmu.

Kerajaan juga bercadang supaya elaun bulanan RM300 juga dinikmati oleh semua pelajar kurang upaya di institusi pendidikan tinggi. Ketika ini, hanya pelajar kurang upaya pendengaran di institusi pendidikan tinggi diberikan elaun bulanan RM300 ini.

Dr Mahathir turut mengumumkan dana khas sebanyak RM10 juta khusus bagi orang kurang upaya yang menghadapi penyakit kronik.

Beliau berkata, peluang pekerjaan bagi orang kurang upaya penglihatan seperti jurutaip, jurutrengkas dan telefonis kian berkurangan dan mereka perlu diberi kemahiran dalam bidang baru seperti Teknologi Maklumat (IT), fisioterapi dan lain-lain.

Katanya, Persatuan Orang Buta digalakkan membuka rangkaian kedai francais bertujuan memberi lebih banyak peluang pekerjaan kepada mereka dalam bidang keusahawanan.

"Mereka boleh mendapatkan pembiayaan di bawah Skim Kredit Mikro kerajaan dan akan diberi lokasi yang sesuai bagi menubuhkan rangkaian kedai francais itu," katanya.

Di samping itu, kerajaan juga akan membiayai sepenuhnya pembelian tongkat berlipat putih dan mesin braille bagi mereka yang kurang upaya penglihatan.